

بِسْمِ اللَّهِ الرَّحْمَنِ الرَّحِيمِ

KHUTBA JUMMAH

HAZRAT MUHYI-UD-DIN AL-KHALIFATULLAH

Munir Ahmad Azim

25 Septembre 2015 ~
(11 Dhul-Hijjah 1436 Hijri)

Eid-ul-Douha Moubarak !

(Résumé Khutba)

Après ki li fine salué tous so bane disciples (et tous bane musulmans) entier le monde avec la salutation de paix dans l'Islam, Hadhrat Muhyi-ud-Din (atba) fine lire Tashahhud, Ta'uz, Surah Al Fatiha, et li fine ensuite axé so Khutba lors:

À sak fois ki le mois de Dhul-Hijjah approché, sa faire nous rappelle épreuve dure ki Hazrat Ibrahim (as) fine vive dans so l'âge avancé. Sa ti ene épreuve unique dans so zarr, et ki l'histoire zamais fine mentionné ene ki pareil à sa.

Quran fine confirme nous:

« Alors kan tous les deux fine soumette zot (à l'ordre d'Allah) et ki li (Ibrahim) fine renverse li (Ismail) lors so front, voilà ki Nous fine appelle li: 'Ô Ibrahim ! To fine ena foi dans to vision. C'est coumsa ki Nous récompense bane ki faire du bien.' En vérité, sa ti là ene épreuve claire. Et Nous fine rançonne li par ene grand sacrifice. » (37: 104-108).

Si Hazrat Ibrahim (as) ti le sujet d'ene telle épreuve, en vérité le Créateur Suprême pas fine impose lors nous sa fardeau lourd là. Mais sakaine bizin conné ki le succès dans la vie lors sa la terre là, et surtout celui dans l'au-delà zamais pou réaliser tanque ki le concept de sacrifice pas bien ancré dans l'esprit et lé cœur d'ene croyant, d'ene serviteur d'Allah.

Le sacrifice li pas 'Qurbani' ou 'Udhiya' (le sacrifice de sang) ki zot tout conné. Mais sa terme là contenir ene signification bien pli vaste. Et donc, d'ene façon pli élargie le terme sacrifice veut dire, donne so propre être et so di bien pour la cause d'Allah (swt) en reconnaissant ki So bane paroles zot bien pli meilleures ki celui de bane simples humains. L'Islam li ene religion qui incite le croyant

pou faire le sacrifice dans tous bane façons. Le croyant bizin toujours prêt pou sacrifier so la vie et so l'âme dans le but pou faire l'islam prévaloir lors tous les autres religions. Li bizin sacrifier de so di bien et de ce fait dépense li dans le chemin d'Allah couma Allah, le Juge et Créateur de tous bane la lois fine ordonné.

Bane ki ena le moyen et ki dans bien au niveau matériel ena ene devoir obligatoire pou veiller à saki bane ki dans le besoin, bane pauvres, bane orphelins, et bane veuves zot recevoir ene part de sa bane dibiens dans zot possession là afin ki ena ene répartition juste de bane dibiens. Ene croyant, le serviteur d'Allah bizin sacrifié so lé temps pou accompli so bane devoirs de tous les jours ki li ena envers so Créateur. L'accomplissement de la prière (*Salaat/Namaz*), récitation Quran, dévotion dans *duahs* (supplication à Allah) et le *Zikr* (rappel) d'Allah nécessite ene grand sacrifice de la part de sa croyant là. Si arriver li alle cherche la connaissance ki pou bénéfique pou li ki li dans so pays natal ou sois li alle à l'extérieur, alors tout sa là nécessite ki li faire ene grand sacrifice. Pareillement, ene professeur bizin sacrifier beaucoup pour ki li capave transmettre bane connaissances ki profitable à so bane z'élèves dans le but pou prépare zot pour mieux confronte bane obstacles du futur. En plusse de sa, sacrifice ki bane parents aussi faire pour zot bane zenfants li bien précieux, parski zot ramasse (économise) sou par sou et dépense sa pour le bien-être de zot bane zenfants.

En bref, nous bizin calkilé ki la vie li nek ene sacrifice et ene la lutte. C'est pour sa ki tous bane messagers, bane prophètes, nous bane grands dimounes ki ti pieux, bane bons croyants ainsi ki bane bons croyantes fine bien comprend le concept de sacrifice. Zot la vies ti synonymes de sacrifice. Le prophète Hazrat Muhammad (saws) fine sacrifié tout so la vie pour le bien de so communauté. So bane compagnons, *Radi'Allahu anhum*, fine aussi sacrifié beaucoup pour la propagation de l'islam. De génération en génération, sakaine fine sacrifié saki zot ti bizin sacrifié pou préserve l'islam et protège li contre tous bane falsifications et changements. Aujourd'hui, c'est nous tour. Eski nous prêts pou faire bane sacrifices dans le but pou protège bane générations futures?

Eh bien, anou opté pour ene grand « OUI » malgré tous bane obstacles ki nous société moderne impose lors nous. Médite donc lors sa verset là avant ki li trop tard :

« Dire : 'Si ou papa, ou zenfants, ou frères et sœurs, ou mari ou bien ou femme, ou proche parents, l'argent ki ou fine ramasser, ene commerce ki ou peur capave tomber, et ou bane la caze dans ki ou prend plaisir, si ou content tout sa plisse ki Allah, So prophète et lutter pou So cause, alors attane ziska ki l'ordre Allah arriver. Allah pas guide dimounes ki prend chemin travers'. » (9: 24)

Avant mo termine mo Khutba, c'est mo devoir pou donne zot quelques conseils à propos de *Zaba* de bane zaimo. Li bien triste pou constater ki ena beaucoup de bane musulmans ki pas conné couma faire *Zaba* ene zaimo pour le Qurbani, et zot pas conné aussi ki sa c'est ene acte de grands valeurs, kot là-dans ena beaucoup bénédiction. Alors ki ene croyant bizin faire pou faire *Zaba* ene zaimo pour le Qurbani ?

Dans ene Hadith rapporté par Ummé Salama (ra), le Saint Prophète (saws) fine dire : « *Celui ki ena ene zanimou pou sacrifier et ki le croissant de Dhul-Hijjah apparaîte, faudé li ni coupe so cheveux ni coupe so bane z'ongles, ziska ki li fini sacrifié so zanimou.* » (Muslim)

Maintenant mo pou donne zot quelques conseils à propos de *Zaba* (sacrifice zanimou). Le fait c'est ki le *Zaba* li ene acte de très grande valeur auprès d'Allah (swt). Le jour du sacrifice (à noter ki ene croyant ena trois zours pour faire so sacrifice), alors le serviteur d'Allah li ena le devoir pou suivre de près tous bane règlements ki lié à sa acte d'adoration (Ibaadat) là et pou mette li en pratique avec précaution afin ki li vine parmi bane ki Allah (swt) fine accepté zot bane bons actions.

1. Pas prive zanimou là de manger et boire avant faire *Zaba* (avant sacrifier li).
2. Tourne zanimou là en direction de Ka'aba Shareef (le *Qibla* islamique).
3. Agir avec douceur envers li.
4. Pas torture li en aucaine façon.
5. Pas insulté zanimou là.
6. Aiguize zot bane couteaux et zot bane z'outils bien.
7. Fini faire zot l'intention dans zot lé cœur.
8. Faire *Bismillah* et *Takbir* (c'est-à-dire, *Bismillah Wallaahou Akbar*).
9. Coupe la gorge de zanimou là et so deux la veines jugulaires (gros la veine licou).
10. Laisse disang couler nette et pas prèssé pou amène la mort de sa zanimou là (couma fini fer *Zaba*, laisse disang couler et laisse la mort vini tout naturellement) et non plus fer bane tels actions couma casse zanimou là so licou, ou bien sipa poignard li dans so licou (Non!).
11. Cachiette bane les autres zanimou pou sacrifier de celui ki pé sacrifié afin ki sa bane les autres zanimou là pas trouve la mort de sa l'autre zanimou là devant zot lizié.
12. Pas faire bane moqueries, bane ironies ou prend sa moment là couma ene l'amusement.
13. Garde zot loin de l'ostentation (show; montrer lizié dimounes) et toutes sortes de bane disputes.
14. Observe bane l'heures de bane *Salaat* (Namaz) et donne priorité à bane droits d'Allah (swt).

Ki Allah accepté nous bane l'intentions pures et nous bane sacrifices, non seulement à l'occasion de fête *Eid-ul-Adha* mais aussi tous bane sacrifices ki nous fine faire, et ki nous pou continuer faire par So grâce immense jusqu'à nous dernier souffle lors la terre. *Ameen*.

ANNONCE :

1. Dans sa Hajj de 2015 fine ena bane morts, cette fois-ci hier dans Mina kan bane Hajeess ti pé alle faire ene de bane rites majeures du Hajj, c'est-à-dire, batte Shaytane. Avec la foulée de bane Hajeess, ki de plus en plus en grand nombres pou alle faire Hajj, alors avec sa grand la foule de plus de 1.9 millions Hajeess, alors bane Hajjis fine bousculer et tombe lors zot camarades et dans le moment, sa fine déclenche ene situation critique, kot bane Hajeess fine marche lors zot camarades. Sa vraiment ene situation difficile mais selman nous pas capave dire ki c'est à cause zot nombres ki sa fine arriver. Li bien triste saki fine arriver et tanque ki Allah pas fer moi compran lors sa situation, mo pas pou capave prononce nannié. *Insha-Allah*, ki Allah accepter sacrifices de bane Hajeess ki fine mort dans sa mort en masse là, kot plisse ki 700 dimounes fine trouve la mort et plisse ki 850 fine bléssés. Ki Allah donne bane ki fine bléssé ene joli patience (*Sabran Jameel*) et pardonne zot et garde zot toujours lors le *Siratwal Mustaqeem*, et ki zot récolter le fruit de zot zéffort dans le chemin d'Allah, dans sa le monde là et dans Aakhirat. *Ameen*.

2. Et de l'autre côté dans Yémen, saki malheureux pou dire, ene grand jour Bakr Eid hier, bane musulmans fanatique fine targette ene masjeed de bane Shias, et fine éclate bombes (ene ene soi-disant *Jihaad*) ki fine fer au moins 25 morts et plusieurs bléssés. Sa li bien malheureux. Bane musulmans fine vraiment gatte l'enseignement de l'islam dans tout façon, et c'est l'islam et bane vrais croyants, ki pé paye les pots cassé.